

China Yakin Capai Sasaran Pertumbuhan Perdagangan Luar

Bernama

7 Mac, 2014

Oleh Niam Seet Wei

BEIJING, 7 Mac (Bernama) -- China yakin akan dapat mencapai sasaran pertumbuhan 7.5 peratus dalam perdagangan luar pada tahun ini, kata Menteri Perdagangan Gao Hucheng.

Beliau berkata ekonomi dunia terutamanya di negara-negara maju, terus mengekalkan momentum pemulihan dan ini akan membawa kepada pertambahan sederhana dalam permintaan.

"Pasaran baru muncul ini mempunyai kedudukan sangat baik untuk mengekalkan pertumbuhan kukuh yang akan membantu meningkatkan eksport dari China.

"Oleh itu, kami yakin akan mencapai sasaran tahun ini," katanya dalam satu taklimat media di sini Jumaat.

Perdana Menteri China Li Keqiang semasa mengumumkan laporan kerja kerajaan pada Rabu lepas berkata perdagangan luar China dijangka meningkat sebanyak 7.5 peratus tahun ini.

Jumlah eksport dan import China mencecah AS\$4.16 trilion, naik 7.6 peratus tahun ke tahun pada 2013.

Bagaimanapun, ia tidak mencapai sasaran rasmi pertumbuhan sebanyak lapan peratus.

Gao berkata kerajaan memberi perhatian terhadap rundingan Perkongsian Trans Pasifik dan akan terus berhubung dengan pihak-pihak yang terlibat.

"China terbuka kepada strategi zon perdagangan bebas dan menilainya secara aktif," katanya.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1020024>